

Consillu Armânjloru

(Consillu Makedonarmânjloru)

www.makedonarman-council.org e-mail : info@makedonarman-council.org

Bulitinu Infurmativu

Tu 31-li di Martsu 2012, Tirana / Arbinishii, s-dizvârti Andamusea Ghenerealâ di aradhâ di estanu a Consillui MakedonArmânjloru (CMA). Ashi cumu spuni statutlu CMA, andamusea ghenerealâ di-aradhâ prindi sâ s-tsânâ unâ oarâ tru-anu, alanti andamusi CMA di cathi anu, tsi suntu nafoarâ di-aradhâ, s-tsânâ di câti ori easti ananghi.

Andamusea CMA di Tirana, ashî cumu sh-atsea ditu soni di Skopje / Ripublica Makidunia ditu 5-li di Brumaru 2011, fu dishcljisâ ti tuts atselji armânji tsi au sinferu trâ lucurlu armâneascu. Dealieha dukimu aestu sinferu la multsâ tiniri ditu Arbinishii tsi au loatâ parti la aestâ andamusi dishcljisâ shi sh-aspusirâ aestu sinferu pritu zborlu tsi lu-avurâ.

La aestâ andamusi prindea sâ s-aleagâ sh-naua cumândâseari trâ yinitorlu mandatu di trei anji (2012-2015). Biroulu Executivu CMA lo apofasea s-pingâ aesti nali alidzeri trâ nica trei meshi, pânâ tu ishita di Cirisharu.

Ditu aghenda di lucru ali andamusea di consilu di Tirana, andamusi tsi s-dizvârti tu kiro di cama di 8 sihâts, thimisimu giueapea trâ activitatea Biroului di Cumândâseari – pârâstisîtâ di prezidentulu Yiani Mantsu sh-di grâmâticlu gheneralu Niculaki Caracota, muabets ligati di scamnulu CMA, aprukearea di nâi membri CMA, pripuniri tsi s-adrarâ trâ alâxeri tu statutu, cata cumu sh-apofasea tsi s-ari loatâ trâ unâ adunari armâneascâ Crushuva / Ripublica Makidunia.

Diligatslji pitricuts la aestâ andamusi di farili membri tu CMA au apufusîtâ sh-unu comunicatu di presâ tsi fu pârâstisitu di prezidentulu Yiani Mantsu trâ unu canalu TV ditu Arbinishii. Tu aestu comunicatu, trâ nutritorlji ditu Arbinishii, s-adusi aminti di alumta sh-sândzâli tsi-lu virsarâ armânjilji trâ thimiljiusearea a statlui natsiunalu arbinesu – trâ itia câ estanu s-umpli 100 di anji di la indipidentsa a statlui arbinesu.

Consillu Armânjloru

(Consillu Makedonarmânjloru)

www.makedonarman-council.org e-mail : info@makedonarman-council.org

Tu comunicatu s-câftă unu dialogu dishcljisu di la guvernulu arbinesu, dialogu tu cari, deadunu, s-hibâ analidzati meatrili tsi prindi s-hibâ loati ta sâ s-asiyuripseascâ vigljearea, crishtearea sh-prumuvarea a limbâljei armâneascâ, a culturâljei sh-adetsloru, a spiritului armânescu spetsificu tu aestu cratu.

La andamusea di consilu ditu Cirisharu, consillu va aibâ tu muabeti sh-andridzerli tsi prindi s-ankiseascâ trâ

Marea Andamusi a Armânjloru

tu 5-li di Agustu, estanu, Crushuva / Rîpublica Makîdunia

Isturia a câsâbăului armânescu Crushuva easti ligatu di anlu 1903, cumu sh-di numa Pitu Guli. Estanu s-umpli 99 di anji di cându, la anlu 1903, laolu ditu Turkia evropeanâ s-mută contra a Amirâriljei Otomanâ.

Anlu 1903 thimiseashti minarea di Crushuva, aclo iu hlambura a ribilipseariljei s-featsi trâ thimiljiusearea ali unâ “rîpublicâ multietnicâ”, cu numa Makedonia, trâ tuts bânâtorilji ditu locurli a ljei. Trâ aestâ soie di rîpublicâ muri sh-armânlu Pitu Guli!

Consillu MakedonArmânloru
Biroulu di Cumândâseari

tu 04-li di Apriiru, 2012

(Bulitinu Infurmativu Nr. 34)